



Cigarittikut taamatullu cigarittit kimmivikui utertittartussanngorlugit qularnaveeqquserneqartalernissaasa iluaqutissartai ajoqutissartaalu misissuivigeqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinerup inernera Inatsisartunut saqqummiuteqquneqarpoq kingusinnerpaamik UKA 2020-mi ataatsimiinneq aallartippat.

(Inatsisartunut ilaasortaq Justus Hansen, Demokraatit)
(Siullermeerneqarnera)

Demokraatit Inatsisartunut ilaasortaq Justus Hansen matumuuna siunnersuuteqarsimaneranut qujaffigerusuppat.

Aqqusinerni pinngortitamilu cigarittit kimmivikui sumi tamaani takussaanerat ajornartorsuititut isigaarput. Kissaatigigaluaqaarput pujortartartut nammineerlutik akisussaaqqarlutik cigarittimi kimmivikuinik eqqaasarunnaassasut. Ajoralurtumilli suli imaappasippoq pujortartartut cigarittip kimmivikuinik piumasaminik sumut tamaanut eqqaasarnerat inuiaqatigiit akornanni akuerisaarpasittuusooq.

Tamatumuuna Demokraatit isumaqarput pujortartartut akornganni isummanik allanngortitsineq pisariaqartoq. Cigarittit kimmivikui eqqagassatut allatuulli, soorlu mamakujuttut puukui il. il. isigineqartartariaqalersoraavut. Imatut paasillugu sumut tamaannga aqqusinernut pinngortitamullu eqqagassanik eqqaasannginnissaq tamat isumaqatigiissutigissangaat.

Matumuuna siunnersuuteqarnermini Inatsisartunut ilaasortaq Justus Hansen-ip cigarittit kimmivikuinik utertittartussanngorlugit qularnaveeqquserneqartalernissaasa iluaqutissartai ajoqutissartaalu misissoqquvai, tamannalu isumassatsialaallunilu misissugassaqqittuuvoq.

Paasivara qanoq iliornikkut cigarittit kimmivikuinik eqqaaginnartarneq millisinneqarsinnaanersoq Naalackersuisut siammasinnerusumik allannguutissatut siunnersuuteqarsimasut. Tammanna aamma isumatsialaavoq.

Demokraatinulli pingaarnersaavoq taamatut siammasinnerusumik misissuinissap aamma cigarittit kimmivikui utertittartussanngorlugit qularnaveeqquserneqartalernissaasa iluaqutissartai ajoqutissartaalu misissuivigineqanissaat pingaaruteqarmata erseqqissarusupparput.

Taamatut oqaaseqarluta siunnersuut Avatangiisinut Eqqissisimatitsinermullu Ataatsimiititaliamut sammineqarnissaanut innersuupparput.